

दिनांक 25.04.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- गृहमंत्री अमित शाह सगळा राज्यां रा मुख्यमंत्रियां ऊं आप-आप रा राज्य मांय पाकिस्तानी नागरिकां री पिछाण कर र वां ने पाछा भेजण सारू कह्यो।
- केन्द्रीय मंत्री धर्मेन्द्र प्रधान आबूरोड रा शांति वन मांय राष्ट्रीय शिक्षाविद् सम्मेलन रो उद्घाटन कीनो।
- प्रसार भारती री ओर ऊं विकसित ओटीटी प्लेटफॉर्म वेब्स माथे भांत-भांत रा पारिवारिक कार्यक्रम मुफ्त उपलब्ध।
- जयपुर, अजमेर, भरतपुर अर कोटा संभाग मांय काल कठे-कठे तेज बायरो बाजण अर हल्की बारिश रा आसार।

गृह मंत्री अमित शाह आज सगळा राज्यां रा मुख्यमंत्रियां सागे बात कर र वां ऊं आप-आप रा राज्य मांय पाकिस्तान रा लोगां री पिछाण करण बाबत् कह्यो है। पहलगाम आतंकी हमला पाछे भारत री ओर ऊं पाकिस्तानी नागरिकां ने जारी करी ज्या वीजा रद्द करण रा एक दिन पछे ई ओ कदम उठायी ज्यो है। श्री शाह मुख्यमंत्रियां ऊं पाकिस्तानियां री बेगी वापसी तैय करण बाबत् कह्यो। गृह मंत्री आज नई दिल्ली मांय सिंधु जल संधि रा बारा मांय ई जल शक्ति मंत्री सी आर पाटिल अर आला अहलकारां सागे बातचीत कीनी। ध्यानजोग है के भारत पहलगाम हमला मांय पाकिस्तान रो हाथ व्हेवण ने ध्यान राखता थकां सिंधु जल संधि ने निलंबित कर दीनी है। ई बीचे सेना प्रमुख जनरल उपेन्द्र द्विवेदी आज श्रीनगर पूग्या। वठे फौज रा आला अहलकार जनरल द्विवेदी ने मौजूदा हालात अर आतंकियां रे खिलाफ फौज री कार्यवाही री जाणकारी दीनी। वां ने नियंत्रण रेखा माथे हालात रा बारा मांय ई बतायी ज्यो। ध्यानजोग है के आज संवारे लाईन ऑफ कंट्रोल-एल.ओ.सी. माथे कठे-कठे पाकिस्तान री ओर ऊं गोलाबारी करी ज्यी, जिण रो भारत रा फौजी असरदार तरीका ऊं जवाब दीनो। जम्मू-कश्मीर रा पहलगाम मांय व्ह्या आतंकी हमला पाछे फौज आतंकियां रे खिलाफ जोरदार अभियान चलायो है। हिफाजती दस्ता आतंकियां री मौजूदगी री शंका वाळी ठौड़ां री घेराबंदी कर दीनी है अर हेलीकॉप्टरां रे ज़रिये ई निगराणी राखी जा रही है। पहलगाम आतंकी हमला रा खिलाफ प्रदेश मांय जनता अर न्यारा-न्यारा समूहां री ओर ऊं विरोध प्रदर्शन कर्या जा रह्या है। आज केई ठौड़ां दोपहरां 12 बज्यां ताई दुकानां बंद राखी ज्यी। कोटा, झुन्झुनू अर हनुमानगढ़ समेत न्यारी-न्यारी ठौड़ां बाज़ार बंद राख र हमला रे खिलाफ गुस्सो जतायी ज्यो। राजसमंद माई ई प्रदर्शन कर र ई कायराना हमला री करड़ी निन्दा करी ज्यी। हमला मांय मरण वाळां ने झुन्झुनू मांय कैण्डल मार्च निकाळ र सिरधाभाव सागे याद करी ज्या। पाली मांय शहर रा खास गेला ऊं मशाल रैली निकाळी जा रही है।

केन्द्रीय मंत्री धर्मेन्द्र प्रधान आज सिरौही जिला रा आबू रोड़ मांय ब्रह्मकुमारी संस्थान रा मुख्यालय शांति वन मांय राष्ट्रीय शिक्षाविद् सम्मेलन रो उद्घाटन कीनो। सम्मेलन मांय देशभर रा 400 ऊं बत्ता विश्वविद्यालयां अर कॉलेजां रा प्रोफेसर सिरकत कर रह्या है। **समग्र कल्याण के लिए शिक्षा** मुद्दा माथे राख्या जा रह्या ई सम्मेलन मांय केन्द्रीय शिक्षा मंत्री कह्यो के ब्रह्मकुमारी संस्थान री ओर ऊं समाज सेवा सागे भणार्ई-लिखाई रा हलका मांय सराहवणा जोगो काम कर्यो जा रह्यो है।

. 000

राज्य सरकार नुवा बणायी ज्या जिलां फलौदी, बालोतरा, ब्यावर, सलूमबर, डीग, डीडवाना-कुचामन, खैरथल-तिजारा अर कोटपूतली-बहरोड़ सारू जिला आपदा प्रबंधन प्राधिकरण बणा दीना है। आपदा प्रबंधन विभाग रा संयुक्त शासन सचिव भगवन्त सिंह बतायो के आं जिलां रा कलेक्टर प्राधिकरण रा अध्यक्ष व्हेला, जद के जिला परिषद प्रमुख सह-अध्यक्ष व्हेला। श्री सिंह बतायो के जिला परिषद रा सी.ई.ओ. एस.पी., पी डब्ल्यू डी अर जल संसाधन विभाग रा आला अहलकार प्राधिकरण रा सदस्य व्हेला जद के अपर जिला मजिस्ट्रेट मुख्य कार्यपालक अधिकारी व्हेला।

000

राज्य सरकार नीलामी मांय छूटी खानां ऊं काम सरू करावण माथे खास ध्यान दे रही है। खान विभाग रा प्रमुख सचिव टी. रविकांत खान नीलामी मांय खान हासिल करण वाळां ऊं खाना ऊं खनिज निकालबा री योजना पेश करण सारू कह्यो है। श्री रविकांत आज खान लीज धारकां सागे वचुर्अल तरीका ऊं बातचीत कीनी।

000

भ्रष्टाचार निरोधक ब्यूरो री टीम बांसवाड़ा मांय एक थाना अधिकारी अर वां सारू घूस री रकम लेवण वाळा दलाल ने अढ़ाई लाख रुपया री घूस लेता रंगे हाथां पकड लीना। एसीबी रा महानिदेशक डॉ. रवि प्रकाश मेहरड़ा बतायो के राजतालाब थाना अधिकारी सम्पत्ति कुर्की री बच्योड़ी गाड़ियां ज़ब्त नी करण री ऐवज मांय आ रकम मांगी ही। पकड़ी ज्या आरोपितां कानी ऊं ई मामला मांय पैली लीरीजी घूस री एक लाख रुपया री रकम थाना परिसर ऊं ज़ब्त करी ज्यी।

000

देश रा लोक प्रसारक प्रसार भारती री पहल परां विकसित करी ज्यो ओटीटी प्लेटफॉर्म वेक्स एंड्रॉइड अर आईओएस प्लेटफॉर्म माथे मुफ्त उपलब्ध है। वेक्स प्लेटफॉर्म माथे ज्यादातर चीजां पारिवारिक है। ओटीटी प्लेटफॉर्म वेक्स रा बारा मांय आज जयपुर मांय राख्यी ज्यी एक प्रेसवार्ता मांय जयपुर दूरदर्शन रा उप महानिदेशक सतीश देपाल कह्यो के वेक्स प्लेटफॉर्म माथे दूरदर्शन रा सगळा चैनलां सागे 74 लाइव टीवी चैनल ई उपलब्ध है। ई सागे ई रेडियो चैनलां रा कार्यक्रम ई वेक्स प्लेटफॉर्म माथे सुण्या जा सके है। वे बतायो के ई प्लेटफॉर्म माथे साढे 18 सौ ऊं बत्ती फिल्मां ई देखी जा सके है। श्री देपाल बतायो के ई प्लेटफॉर्म माथे देखण वाळां रा हर वर्ग सारू 26 भाषावां अर बोलियां मांय कार्यक्रम देख्या अर सुण्या जा सके है।

प्रेसवार्ता मांय आकाशवाणी जयपुर रा उप महानिदेशक लोकेश कुमार अर दूरदर्शन अर आकाशवाणी रा केई अहलकार मौजूद रह्या।

000

धौलपुर जिला रा सरमथुरा मांय एक तळाव रा पाणी मांय डूब जावण ऊं तीन बच्चां री मौत व्हे ग्यी। नहावण सारू गया एक ही पिरवार रा अ बच्चा गहरा पाणी मांय डूब गया। एक और हादसा मांय कोटा मांय बूंदी री सरहद परां खैराली गांव कने नेशनल हाईवे नम्बर-52 माथे एक ट्रेलर री फेंट मांय आ जावण ऊं मोटरसाइकिल सवार एक ही पिरवार रा दो जणां री मौत व्हे ग्यी। हादसा पाछे ट्रेलर रो ड्राइवर मौका ऊं फरार व्हे ग्यो।

000

खादय विभाग री टीम आज कोटपुतली-बहरोड़ ज़िला रा नागडीवास गांव मांय मिलावटी दूध बणावण रा कारखाना माथे छापो मार र करीब 1 हजार 100 लीटर मिलावटी दूध ज़ब्त कीनो। ज़ब्त दूध रा नमूना जांच सारू जयपुर री प्रयोगशाला मांय भेज्या है।

000

केन्द्रीय संचार ब्यूरो री ओर ऊं आज डूंगरपुर ज़िला री माथुगामड़ा ग्राम पंचायत मांय **बाल विवाह के दुष्परिणाम** मुद्दा माथे गोष्ठी राख्यी ज्यी। पाली मांय महिला अधिकारिता विभाग री ओर ऊं बाळक जोड़ां रा ब्याह री रोकथाम सारू जाग जगावण रो कार्यक्रम राख्यी ज्यो। इण मांय बाळपणा मांय ब्याह री कुरीति दूर करण सारू शपथ ई दिरायी ज्यी।

000

राज्य मांय लारला चौबीस घंटां मांय केई ठौड़ां ज़ोरदार गर्मी रही। बाड़मेर मांय सब ऊं बत्तो 44 दशमलव 8 डिग्री सेल्सियस तापमान दर्ज करी ज्यो, जो सामान्य ऊं करीब 5 डिग्री सेल्सियस ऊंचो है। जयपुर अर जोधपुर संभाग मांय ई कटे-कटे उन्नो बायरो बाज्यो अर पारो सामान्य ऊं तीन ऊं 5 डिग्री सेल्सियस ताई बत्तो रिकॉर्ड करी ज्यो। मौसम विभाग रे मुजब आवता तीन-चार दिन मांय पारो 2 ऊं 3 डिग्री सेल्सियस ताई और चढ़बा रा आसार है। ई बीच एक और पश्चिमी विक्षोभ रा असर ऊं काल जयपुर, अजमेर, भरतपुर अर कोटा संभाग मांय कटे-कटे दोपहरां पाछे गरज सागे हल्की बारिश व्हेवण अर ज़ोरदार बायरो बाजण रा आसार है। आवता महीना रा पहला सप्ताह मांय आंधी-बारिश मांय बधोतरी ऊं गर्मी ऊं साता मिलण री संभावना है।

000

भारतीय अन्तरिक्ष अनुसंधान संस्थान-इसरो रा पैली वाळा अध्यक्ष अर राष्ट्रीय शिक्षा नीति बणावण मांय खास योगदान देवण वाळा 84 साल रा डॉ. के. कस्तूरी रंगन आज संवारे बेंगलुरु मांय देवलोक व्हे गया। प्रधानमंत्री नरेन्द्र मोदी सोशल मीडिया रे जरिये दुःख जताता थकां कह्यो के डॉ० कस्तूरी रंगन इसरो मांय करड़ी मेहनत कर र भारत रा अंतरिक्ष कार्यक्रम ने नुवी बुलंदियां ताई पूगायो।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम **मन की बात** मांय ई दीतवार 27 अप्रैल ने विचार बतावेला। आ ई कार्यक्रम री 121वीं कड़ी व्हेला।

000

आज विश्व मलेरिया दिवस है। राजस्थान री ई मलेरिया री बीमारी ने जड़ ऊं खत्म करण रा हलका मांय काम करण रा मामला मांय देश रा अगाड़ी राज्यां मांय गिणती करी जावे है। चिकित्सा एवं स्वास्थ्य विभाग बेहतरीन सेवा सागे नवाचार अर जनता मांय जाग जगा र इण री रोकथाम री कोशिश कर रह्यो है।

000

आईपीएल क्रिकेट होड़ रा तैत आज आज चेन्नई मांय चेन्नई सुपर किंग्स अर सनराइजर्स हैदराबाद बीच मुकाबलो व्हेला। ओ मैच अब ऊं थोड़ी देर पछे साढ़े सात बज्या सरू व्हेला।

000